



Aningaasanut Naalackersuisoq

Aningaasaqarnermut Ataatsimiititaliap suliaq nr. 01.31.06/08-00417 pillugu sapaammi ulloq 28. juni 2009-mi aalajangiinera pillugu Naalackersuisunut ilisimatitsineq

Nunaqarfinni nunaqarfinnulluunniit aamma illoqarfinnut qanittuni tunisisinnaanikkut inuussutissarsiorsinnaanermut annermik periarfissaqarfiusuni suliffissaqartitsineq, ilinniartitsineq ilinniartitseqqiinerlu siuarsarniarlugit 20 mio. kr.-inik sillimmatissanik pilersitsinissaq pillugu qinnuteqaat.

Naalackersuisut **inassuteqaatigaat,**

- konto pingaarneq 20.11.72, nunaqarfinni illoqarfinnilu aqqisigut taasanut immikkut ittunut aamma suliassaqartitsissutinut atugassanik 20 mio. kr.-inik qaffanneqassasoq,
- ukiumi aningaasaliiffiusumi 2009-mi DAU-mi amigartoorutit 20 mio. kr.-inik qaffanneqassasut.

Aningaasaqarnermut Ataatsimiititaliap oqaaseqaatai

Inatsisartut 2009-mi junimi immikkut ittumik ataatsimiinneranni Inatsisartut immikkoortoq 20-mik akuersissuteqarnerat tunngavigalugu nunaqarfinni arlalinni immikkut suliniuteqarnissamat 20 mio. kr.-inik sillimmatit pilersinneqarnissaat Naalackersuisut suliami matumani qinnutigaat. Sillimmatit Aningaasaqarnermut Ataatsimiititaliamut qinnuteqarnerup kingorna suliniutinut aalajangersimasunut atugassanngortinneqarsinnaassapput.

Aningaasaqarnermut Ataatsimiititaliap aallarniutigalugu oqaatigissavaa nunaqarfinni arlalinni tunitsiviit pisortanit tapiissuteqarnatik ullumikkut ingerlammata. Tamanna sapinngisamik annertunerpaamik ingerlasoqartariaqartoq ataatsimiititaliaq tunngaviumik isigalugu isumaqarpoq. Taamaattumik tunitsivinnut tunisassiortunullu pisortanit tapiissuteqarnatik ingerlasunut ajoqutaasumik unammilleqatigiinnermik equngatitsilissutaasumik tapiissutit atorneqannginnissaat nunaqarfinni tunisassiorfinnut tapiissuteqartarnermi aammalu tamatumani kiffartuussinissamik isumaqatigiissuteqartarnermi sapinngisamik annertunerpaamik qulakkeerniarneqassaaq.

Nunaqarfinnut tunngasuni immikkoortukkuutaamik anguniakkanik Naalackersuisut suliarinnillutik aallartissimmamata ataatsimiititaliamit naammagisimaarneqarluni maluginiarneqarpoq. Suliap tamatuma pisariaqartumik siuarsarneqarnissaat Naalackersuisunit qulakkeerneqassasoq ataatsimiititaliamit naatsorsuutigineqarlunilu neriuutigineqarpoq, taamaalilluni tamatumani siunissaq ungasinnerusoq isigalugu pilersaarutunik piviusorsioortunik

piaartumik saqqummiussisoqarsinnaaqullugu. Nunaqarfinni innuttaasut inuussutissarsiutitut allanut tapiiffigineqarnissamillu pisariaqartitsinnginnerusunut nuunnissamut periarfissinneqarnerat ilutigalugu tunitsivinnut tapiissutit sapinngisamik annikillisarneqarnissaat pillugu anguniakkanik nunaqarfinnut immikkoortukkuutaamik anguniakkat tamakku ilaatigut tunngaveqartariaqartut ataatsimiititaliaq isumaqarpoq. Taamatut anguniagaqarneq innuttaasunut ersarissumik nalunaarutigineqartariaqarpoq.

Arctic Green Food maanna aqutsisoqarnikkut aningaasaqarnikkullu taama inissisimatillugu pisortanit tapiiffigineqassanngitsoq suleqatigiissitaliap nalunaarusiamik qinnuteqaammi innersuussutigineqartumik suliarinnittup toqqaannartumik kaammattuutigigaa ataatsimiititaliap maluginiarpaa. Ingerlatseqatigiiffiup aqutsinerani naatsorsuuserineq pillugu inatsimmi piumasaqaatit eqquutsinneqanngitsut aammalu ingerlatseqatigiiffimmi aningaasartuutit ingerlaarnerat nakkutigineqanngitsoq nalunaarusiami ilaatigut allassimavoq (qupp. 18 kiisalu 26). Aammattaaq ingerlatseqatigiiffiup 2008-mi angusaasa ajornerannut Namminersornerullutik Oqartussat kiffartuussinissamik isumaqatigiissummut akiliutaasa ikilineqarnerat kisimi pissutaaginnarani aammali tunisassiornermut, naammassisaqarsinnaassutsimut sulisorisanullu aningaasartuutit annertuseriarujussuarnerat pissutaasoq allassimavoq (qupperneq 21). Ingerlatseqatigiiffiup kiffartuussinissamik isumaqatigiissutit pillugit isumaqatiginiarnissaani tulliuttumi ajornartorsiutit pisullu sunniutillit tamakku isummerfigineqartariaqartut Naalakkersuisut assigalugit ataatsimiititaliaq isumaqarpoq. Tamanna isumaqatigiissutitut assingusut aqutigalugit Naalakkersuisut piumasaqarnerisigut pisariaqarpoq.

Kiisalu Inatsisartut aalajangiinerat malillugu sillimmatitut immikkoortinneqartut suliffissaqartitsiniarnermik, ilinniartitsinermik ilinniartitseqqiinnermillu qulakkeerinissamut atornerqarsinnaassasut Aningaasaqarnermut Ataatsimiititaliamit maluginiarneqarpoq. Missingersuutinulli ilanngussami nassiunneqartumi taamaallaat suliaasaqartitsinissaq qulakkeerniarlugu suliniutit kisimik eqqaaneqarput. Ilinniartitaanerup ilinniartitseqqiinnerullu missingersuutinut ilanngussami aamma taaneqarnissaat aningaasaliissutit taakku akuersissutigineranni ataatsimiititaliap piumasaqaatigaa. Tamanna oqaaseqatigiinni immikkut sisamat ilisarnaasikkat ataanniittuni immikkoortumik ataatsimik arlalinnilluunniit ilanngussinikkut pisariinnerusumik pisinnaavoq.

Aningaasaqarnermut Ataatsimiititaliap aalajangiinera

Oqaaseqaatitut siuliani allassimasunut naapertuuttumik kontomut pingaarnermut 20.11.72-imut missingersuutinut ilanngussamik iluarsisamik Naalakkersuisut nassiussinissaat **tunngavissaatillugu** Naalakkersuisunit inassuteqaatit Aningaasaqarnermut Ataatsimiititaliap **akuersissutigai**. Missingersuutinut ilanngussamut ataatsimiititaliamut nassiunneqaqqaartumut taarsiullugu missingersuutinut ilanngussaq iluarsisaq 2009-mi ilassutitut aningaasaliissutitut inatsimmut ilanngunneqassaaq. Allakkat uku tигunerinit ullut arfineq marluk qaangiutsinnagit missingersuutinut ilanngussaq kalaallisut danskisullu nassiuteqquneqarpoq elektroniskiusumillu uunga nassiuteqquneqarluni nch@gh.gl.

Aningaasaqarnermut Ataatsimiititaliap sinnerlugu

Akitsinnguaq Olsen

Aningaasaqarnermut Ataatsimiititaliami siulittaasoq